

Et cussi risponderano, et loro voleno el Pontefice fazi la sua guardia de sguizari; hanno contentà pur non sia ubligato levar 6000 fanti. *Item*, voleno far questa nova liga senza preiuditio de le altre lige. Li oratori sguizari stati in la dieta dieno portar li capitoli de la liga a li loro signori, et a li 24 del presente se farà un' altra dieta a Lucerna. Scrive esso secretario come li oratori dil Papa et di Cesare iustificano quei signori dil caso dil Meraveia et lui insieme, sichè restono satisfati. Questi hanno fato intender a li 7 Cantoni luterani che saria ben insieme se facesse questa liga a beneficio suo et de Italia, et che volesseno esser de la sua religione, pretendendo iniustamente il re Christianissimo el stato de Milan, qual ha renoncià per capitoli fati con Cesare. Li hanno risposto che tal renunzia fece hessendo incarzarato el re in Spagna et la renuntia fu con violentia et non tiene. In tempo se faceva ditta dieta, gionse una caretta con 6 cavalli carga de danari dil re Christianissimo per pagar le pension; li risposeno li toriano a bon conto di le pension, et refeririano ai loro signori, dicendo che volendo Soa

196* Maestà levar fanti contra el stato de Milano, loro voleno tutte le pensione dieno haver, et a li 24 a la dieta li risponderano. Li oratori francesi insta haver li fanti et contrariano a la liga se trata, dicendo el duca non li dà vituarie, ha fato morir el scudier Maraveia, et sollicitano i Valesi e Grisoni el meter a ordine per el levar di fanti quanto possono, praticando *secrete* con li amici et *publice* con li 6 Cantoni christiani per levar ditti fanti, *unde* li Signori, intese queste pratiche private, li hanno fato intender si astengano *aliter* li sarano inimici; et voleno saper ditti Cantoni christiani se havendo guera con li Cantoni luterani per la fede, si 'l re Christianissimo li aiuterano: essi oratori hanno risposto non haver mandato de questo et scriverano al re et a la secunda dieta li risponderano. Esso secretario Panizone insta el duca li dagi la trata *aliter* se farano de li fanti a nome dil re Christianissimo.

Di Spagna, di sier Marco Antonio Contarini orator, da Monzon, di 16 Luio, ricevute a di 20 Avosto, da matina. Che hessendo alozato mia 12 lontan de qui et spazando in Italia, scrive perchè questi rimandano li capitoli de la liga se trata far con Sguizari reformati, non però cose de substantia, et questa Maestà ha scritto a Roma et a Milan al protonotario Carazolo li concludi, et hessendo cose non preiudicial a Soa Maestà li fazi diti capitoli. Cesare gionse qui heri de note, la matina vini in questa cità et questa matina

poco avanti mezo zorno avi audientia de quella, qual era vestita, in piedi a una finestra con optima ciera et molto alegra; mi congratulai con Soa Maestà de la sua venuta sana et di esser varita la serenissima imperatrice, et questo feva per nome de la Signoria che di ogni ben de Soa Maestà se alegrava et de ogni dolor ne partecipava, con altre parole. Mi rispose era certissima. La ringratiai de la letera ordinata scriver al serenissimo re di Romani per poner fin a tutte le differentie; disse l'havea ordinà in bona forma et la espediria. Dissi de avisi da Constantinopoli venuti haver avisato el suo Conseio; disse haverli intesi, et ringratiava la Signoria. Et de la causa del Ram nè de la letera de le trate non mi parse dirli altro, la qual causa dil Ram se trata ne la rota de Barzelona, et intendo è per far sententia; sono alcuni frati heriedi che sollicitano. Io non ho scrittura; fata la sententia potrà venir la represaia. Di la trata dubito sarà difficultà otenirla per esser stà magro ricolto in quei regni. Et parlando con mons. Longavilla (*Granvilla*), me disse el Doria sarà prima adosso l'armata turchesca che se intendi sii andato in gallia. Fo dito qui da li sindaci de Valenza che l'armata de Barbarossa de fuste 30 et galie 6 era ne la spiza de le Cantere et havia fato dar in terra 8 galie de questa Maestà, zoè 4 de Sicilia et 2 de Monaco et 2 de Napoli, capitano el comendador Ricardo, sottoposto però a don Salvar da Basan, et che, se non era l'aiuto ave le galie de la terra, dito corsaro lo hariano preso. Mi disse dito Granvilla non esser vero, et haver aviso che le erano a Malica dite galie per andar poi verso Coron insieme con l'armata dil Doria. Et dimandando io de li fanti che in questo regno feno mutation rispòse se faria provision che più non mutariano. Me disse dil marchesato de Monferà questa Maestà non vol nulla, darà notitia de quello ha terminato a don Lopes de Soria. Zerca lo abocamento de Niza me disse non saria sì presto nè li traterano cose de importantia, ben cose de la Chiesa et soe particular, dicendo che, essendo a Bologna ragionando col Pontefice de questo abocamento con Franza, li havia dito Soa Santità advertissa a quello la facesse, perchè facendo se diria non l'havebbe fatto per ignorantia ma *sciens et volens*. La restitution dil ducato de Sora al duca de Urbin, li privilegii è fati, manca *solum* la sottoscrition di Cesare. Non è stà terminà ancora chi dia andar in Fiandra per levar la duchessa de Milan et condurla a Milan, et questo per l'absentia de Cesare, ma se tien andarà monsignor de Prato.